



Agne Lene da un pôc di timp a no fâs che lamentâsi che e piert le viste, che e piert il gust, che e piert le voie, che e piert le sveltece di movisi e di capî ma che no à timp da pierdi a lamentâsi parcè che se no fâs cumó ce che e à da fâ nissun lu fasarà al so puest.

Le sô amie Gjildine, e dîs a di chei che vuelin scoltâle, *che agne Lena da cuant che à fat le cincuantina i taca un mâl ogni matina e cumó a piert encja las vorêlas.*

Cussí a scuén ripeti lis robis ancje trê o cuatri vòltis prime che e vedi capît. *Biada femina, disse Gjildine, sperin che no tâchi ancje a lâ vie di cjâf.*

A varès di lâ dal miedi che forsit il miedi i darà alc par udâla. Dome che a Agne Lene no i plâs di lâ dai miedis e alore le Gjildine, cun chê di fâsi cjapâ la pression e je lade dal miedi par domandâi ce che e podeve fâ pe sorditât di agne Lene. Il miedi i à dite che nol podeve fâ nuie cence viodile di persone ma i à dite di provâ a fâ come dal oculist cuant che si à da lei lis letaris che a son scritis sul mûr di chê altre bande de stanzie.

Alore îr, le Gjildine si é decidude. Rivade fûr di cjase e à provât a cridai pal barcon, ce che e faseve di bon da mangjâ, ma agne Lene no i à rispuindût.

- Joissus, poara femina, a no sint nencja il gno tucâ sul vêri!

Po e à provât a vierzi il puarton di cjase e di cridai vie pal coridôr le stesse domande. Ma cence vê nissune rispueste nancje li.

- Joissus mari, disse, a è diventada plui sorda di ce ch'ò pensavi e plui vecja di ce ch'ò crodevi!

Su le puarte de cusine, forsite che li e varès podût sintî:

- Bondi po Lena, ce fâtu da mangjâ vuê, po?

Ma nancje li agne Lene no si jere ni voltade ni i veve rispuindût.

Alore, pe cuinte volte da doi metros di distance i veve domandât:

- Bondi po Lena, ma ce dal osti stâtu fasint da mangjâ vuê po che nancje no tu cji voltas par rispuindi?

Li le rispueste i jere vignude subite e plene di stice:

- Ma, sint mo, Gjildina, a é bielzà la quarta vòlta chi cj'al dîs e cj'al ripet: O fâs mignestra di fasois! Setu diventada sorda?

Cussí la Gjildina a sa ce ch'a à da dî al miedi. Doi metros. No di plui.

di Jaio Furlanâr

#258